

Nūr yā Andherā?

Andhe kī Shafā



nūr yā andherā? andhe kī shafā

Light or Darkness?
The Healing of the Blind Man

by Bakhtullah

[Ao, Khud Dekh Lo 18]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of no-longer-here
<https://pixabay.com/illustrations/man-male-youth-lad-boy-person-316883/>; Mohamed_hassan <https://pixabay.com/vectors/old-woman-senior-walking-cane-8433305/>; ditto <https://pixabay.com/vectors/silhouette-isolated-older-man-3060100/>; ditto <https://pixabay.com/vectors/silhouette-businessman-move-3115314/>; ditto <https://pixabay.com/vectors/silhouette-businessman-hurry-up-3196572/>; ditto <https://pixabay.com/vectors/silhouette-woman-shopping-bags-pose-4517528/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Nūr ẖhudā kā Kām Zāhir Kartā Hai	2
Nūr Ānkheñ Khol Detā Hai	4
Nūr Khalbalī Machā Detā Hai	6
Nūr Shak meñ Ḍāl Detā Hai	8
Nūr Ḍāñwāḍol Kar Detā Hai	10
Nūr Sharīat kī Qaid se Āzād Kar Detā Hai	11
Nūr kī Manzil: Parastish	16
Nūr Yā Andherā?	18
Injīl, Yūhannā 9	19

Ek ƙhās īd par Īsā Masīh ne farmāyā thā ki main duniyā kā nūr hūñ. Iskā kyā matlab hai? Thoṛī der bād kuchh huā jis se matlab sāf patā chalā.

Yon huā: Īsā Masīh apne shāgirdon ke sāth Yarūshalam meñ chal rahā thā ki ek bhikshu ko galī ke kināre dekhā. Yih ādmī ām bhikshu nahīn thā. Yih bhīkh māngne par majbūr thā. Kyon? Wuh to naujawān thā, us umr meñ jab tāqat achchhī-ƙhāsī hotī hai, jab insān ƙhūb paise kamā saktā hai. Lekin uskā ek maslā thā: wuh paidāish se hī andhā thā.

Sab ruk gae. Shāgird us par afsos karne lage. Hāy, is ādmī ne kabhī sūraj kī kirneñ os kī motiyon meñ chamaktī-damaktī nahīn dekhī thīn. Uskā dil kabhī rangdār phūlon ke nazāre se labrez nahīn huā thā. Uskī āñkheñ kheton kī hariyālī se kabhī

tar-o-tāzā nahīn huī thīn. Us ne kabhī nahīn dekhā thā ki pakshī kis tarah āsmān ko pār karte haiñ. Ki hudhud kis tarah phudaktā huā apnī lañbī choñch se zamīn meñ se kīre nikāltā hai. Sab se baḥkar yih ki na us ne kabhī apnī māñ kī pyār-bharī āñkheñ dekhī thīn na apne bāp kā us par lalkārtā faḥhr. Insān to apne chehre se har jazbā zāhir kartā hai. Pyār aur nafrat, ḡhussā aur shānti, hañsī aur ronā—yih sab kuchh hamāre chehron se mālūm hotā hai. Lekin yih sab kuchh us andhe ke lie ek muhrband kitāb thī jo wuh kabhī nahīn paḥegā.

Lekin Īsā Masīh afsos karne nahīn rukā thā. Wuh to kah chukā thā ki main duniyā kā nūr hūñ. Ab wuh shāgirdon ko dikhānā chāhtā thā ki iskā kyā matlab hai. Pahlī bāt,

Nūr Ḳhudā kā Kām Zāhir Kartā Hai

Andhe ko dekhte dekhte shāgirdon ko wuh ḳhyāl āyā jo hamen bhī jald hī ātā hai: “Ustād, yih ādmī

andhā kyon̄ paidā huā? Kyā iskā koī gunāh hai yā is ke wālidain kā?”

Īsā Masīh ne jawāb diyā,

Na iskā koī gunāh hai aur na is ke wālidain kā. Yih islie huā ki is kī zindagī mein Allāh kā kām zāhir ho jāe.
(Yūhannā 9:3)

Īsā Masīh gunāh ke natījon̄ ke bāre mein ek aham bāt farmātā hai.

► *Kaun-sī bāt?*

Ham nahīn kah sakte ki har musībat gunāh kā natījā hai. Naujawān gunāh ke bāis andhā nahīn huā thā balki is ke pīchhe Ḳhudā kā ḳhās maqsad thā.

► *Maqsad kyā thā?*

Yih ki Ḳhudā kā kām naujawān kī zindagī mein zāhir ho jāe. Īsā Masīh uskī misāl se shāgirdon̄ ko dikhānā chāhtā thā ki nūr kā kyā asar hotā hai. Ham dekheṅge ki nūr kā muḳhtalif logon̄ par asar farq farq hotā hai. Nūr kā pahlā asar,

Nūr Ānkheñ Khol Detā Hai

Īsā Masīh ne zamīn par thūkkar miṭṭī sānī aur andhe kī ānkhoñ par lagā dī. Phir kahā,

Jā, Shiloḳh ke hauz meñ nahā le.
(Shiloḳh kā matlab ‘bhejā huā’ hai.)
(Yūhannā 9:7)

► *Yih kis tarah kā hauz thā?*

Is hauz kā pānī surang ke zariye shahr meñ pahuñchtā thā.

► *Shiloḳh kā kyā matlab hai?*

Bhejā huā.

► *Masīh ne yih kyon farmāyā?*

- Wuh apnī taraf ishārā kar rahā thā jo Ḳhudā Bāp se bhejā gayā thā.
- Us ne uskī ānkhoñ ko ekdam shafā na dī.

► *Kyon?*

Mojize kā awwal maqsad bahālī nahīn balki imān thā. Īsā Masīh chāhtā thā ki andhā hauz par jākar imān kā pahlā qadam uṭhāe. Ḳhud

amal mein āne se uskā īmān thoṛā mazbūt ho jāegā.

- ▶ *Is se ham sachche shāgird ke bāre mein kyā sikh sakte haiin?*

Sachchā shāgird hameshā khud amal mein ātā hai. Āsmān kī bādshāhī mein sust aur lā-parwā shāgirdon ke lie jagah nahīn hai.

- ▶ *Kyā andhā hauz ke pās gayā?*

Bilkul, wuh ekdam gayā. Us ne rāste mein kyā sochā hogā jab wuh galiyon mein ṭaṭol ṭaṭolkar hauz kī taraf jā rahā thā? Uskā dil kitnā ṭarap rahā hogā.

- ▶ *Hauz par andhe ne kyā kiyā?*

Us ne nahā liyā. Wuh kām jo ustād ne farmāyā thā.

- ▶ *Phir kyā huā?*

Uskī ānkhen bahāl huīn aur wuh dekhne lagā.

- ▶ *Kyā uskī shafā hauz ke pānī se huī?*

Nahīn. Wuh duniyā ke nūr se khul gayā. Wāh! Ekdam kitnā mazā! Naujawān pahlī bār hauz kā

pānī dhūp meñ jhilmilātā huā dekh saktā thā. Āsmān kitnā nīlā thā! Jo chhoṭe bādāl nanhī-sī bheṛoñ kī tarah charte charte us par se guzar rahe the wuh kitne dilfareb the. Kuchh log hauz ke kināre baiṭhe yā khare dikhāī die. Naujawān phūle na samāyā. Us ne sochā, pahle ghar wāloñ ko is khushī meñ sharīk karūñ. Wuh kūdtā-phalāngtā huā apne ghar chal diyā. Ab nūr ke dūsre asar par dhyān deñ:

Nūr Khalbalī Machā Detā Hai

Naujawān ke paṛosī aur jānane wāle dang rah gae. Wuh pūchhne lage, “Kyā yih wuhī nahīñ jo baiṭhā bhīkh māñgā kartā thā?”

Bāz ne kahā, “Hāñ, wuhī hai.”

Dūsre shak meñ paṛ gae. “Nahīñ, yih sirf uskā hamshakl hai.”

Lekin naujawān bolā, “Maiñ wuhī hūñ.”

Unhoñ ne us se sawāl kiyā, “Terī āñkheñ kis tarah bahāl huīñ?”

Us ne jawāb diyā, “Wuh ādmī jo Īsā kahlātā hai us ne miṭṭī sānkar merī ānkhon par lagā dī. Phir us ne mujhe kahā, ‘Shiloḡh ke hauz par jā aur nahā le.’ Maiñ wahāñ gayā aur nahāte hī merī ānkheñ bahāl ho gaīñ.”

► *Kyā naujawān ne yih chhipāne kī koshish kī kī mojizā Īsā Masīh se huā hai?*

Nahīñ. Us ne sāf iqrār kiyā ki Īsā Masīh ne yih kām kiyā hai. Īmān kā ek ahm hissā iqrār hai. Yih sunkar khalbalī mach gaī. Unhon ne pūchhā, “Wuh kahāñ hai?”

Us ne jawāb diyā, “Mujhe nahīñ mālūm.” Be-chārā to andhā thā jab Īsā Masīh us ke pās āyā thā. Na us ne use dekhā thā, na yih ki wuh bād meñ kahāñ chalā gayā thā.

Nūr khalbalī machā detā hai. Lekin nūr kā ek tīsrā asar bhī hotā hai:

Nūr Shak meñ Ḍāl Detā Hai

Paṛosī itne jazbe meñ ā gae ki wuh naujawān ko Farīsiyoñ ke pās le gae. Farīsī un ke mazhabī rāhnumā the.

► *Kyā yih rāhnumā ḡhush hue?*

Nahīñ. Wuh ekdam shak meñ paṛ gae.

► *Kyoñ?*

Yih mojizā Sabat yānī Hafte ke din huā thā.

► *Yih rāhnumāoñ ke lie kyoñ ṡhokar kā bāis thā?*

Sharīat ke mutābiq Sabat ke din kām-kāj karnā manā thā. Maqsad yih thā ki logoñ ko Hafte meñ ek din ārām mile. Lekin bād meñ ālimoñ ne ek sīdhī-sī bāt pechīdā banā lī thī. Ab Sabat ke din āṡā gūndhnā bhī manā thā. Is nāte se thoṛī-sī gīlī miṡṡī andhe kī āñkhoñ par lagānā bhī kām ṡhahrāyā jā saktā thā.

Buzurgoñ ne naujawān se pūchh-gachh kī ki uskī āñkheñ kis tarah bahāl huīñ.

Ādmī ne jawāb diyā, “Us ne merī ānkhon par miṭṭī lagā dī, phir mainne nahā liyā aur ab dekh saktā hūn.”

Buzurgon men se bāz ne kahā, “Yih ādmī Allāh kī taraf se nahīn hai, kyonki Sabat ke din kām kartā hai.”

Dūsron ne etarāz kiyā, “Gunāhgār is qism ke ilāhī nishān kis tarah dikhā saktā hai?” Yon un men phūṭ par gai.

► *Is phūṭ se ham kyā sikhte haiñ?*

Jahān Īsā Masīh kā nūr pahuñchtā hai wahān phūṭ partī hai. Kuchh use qabūl karte haiñ lekin kuchh us ke ḳhilāf ho jāte haiñ. Kuchh us nūr men ā jāte haiñ lekin kuchh andhere ke sāyon men khisak jāte haiñ.

► *Āpne kyā faislā kiyā hai? Kyā āpne use qabūl kiyā yā us ke ḳhilāf ho gae haiñ?*

Buzurg dubārā naujawān se muḳhātib hue, “Tū ḳhud is ke bāre men kyā kahtā hai? Us ne to terī hī ānkhon ko bahāl kiyā hai.”

Naujawān ne jawāb diyā, “Wuh nabī hai.”

► *Kyā āpne kuchh mahsūs kiyā?*

Āhistā āhistā andhe kī Īsā Masīh ke bāre rāy
barḥ rahī hai. Ab wuh use nabī ṭhahrā rahā hai.

► *Āpki Īsā Masīh ke bāre mein rāy kyā hai?*

Nūr kā ek chauthā asar bhī hotā hai,

Nūr Dānwāṇḍol Kar Detā Hai

Buzurgoṅ ko yaqīn nahīn ā rahā thā ki naujawān
pahle andhā thā. Unhoṅ ne us ke wālidain ko
bulāyā. Un se pūchhā, “Kyā yih tumhārā beṭā hai,
wuhī jis ke bāre mein tum kahte ho ki wuh andhā
paidā huā thā? Ab yih kis tarah dekh saktā hai?”

Us ke wālidain ne jawāb diyā, “Ham jānte haiṅ ki
yih hamārā beṭā hai aur ki yih paidā hote waqt
andhā thā. Lekin hameṅ mālūm nahīn ki ab yih
kis tarah dekh saktā hai yā ki kis ne is kī āṅkhoṅ
ko bahāl kiyā hai. Is se ḵhud patā kareṅ, yih bāligh
hai. Yih ḵhud apne bāre mein batā saktā hai.”

Asl mein wālidain ko ḍar thā islie yon kahā. Kyonki faislā ho chukā thā ki jo bhī Īsā Masīh ke haq mein ho use jamāt se nikāl diyā jāegā.

► *Kyā āpko aisā koī ḍar hai?*

Mān-bāp buzurgoñ se ḍarkar gol-mol bāteñ karne lage. Kitne log gol-mol bāteñ karne lagte haiñ jab un se pūchhā jāe ki tum Īsā Masīh ke bāre mein kyā sochte ho. Wuh sāf bāt karne ko taiyār nahīñ hote. Nūr kā pānchwāñ asar:

Nūr Sharīat kī Qaid se Āzād Kar Detā Hai

Buzurgoñ ne ek bār phir naujawān ko bulāyā, “Allāh ko jalāl de, ham to jānte haiñ ki yih ādmī gunāhgār hai.”

Ādmī ne jawāb diyā, “Mujhe kyā patā hai ki wuh gunāhgār hai yā nahīñ, lekin ek bāt main jāntā hūñ: Pahle main andhā thā, aur ab main dekh saktā hūñ!”

Yih ādmī kitnā chust thā. Us ne apne mān-bāp kī-sī gol-mol bāteñ na kiñ balki sīdhā wuh bāt kī jo sab kī āñkhoñ ke sāmne thī.

Phir unhoñ ne us se sawāl kiyā, “Us ne tere sāth kyā kiyā? Us ne kis tarah terī āñkhoñ ko bahāl kar diyā?”

Ab naujawān ne apnā āpā kho baiṭhā. Us ne jawāb diyā, “Main pahle bhī āpko batā chukā hūñ aur āpne sunā nahīñ. Kyā āp bhī us ke shāgird bananā chāhte haiñ?”

Buzurgoñ kā sirf ek maqsad thā. Yih ki bār bār pūchhne se use ḡhalat sābit karenī. Islie naujawān ne mazāq meñ kahā ki kyā āp bhī us ke shāgird bananā chāhte haiñ? Wuh to ḡhūb jāntā thā ki wuh shāgird nahīñ bananā chāhte the.

► *Kyā āpne dhyān diyā ki naujawān ne apne bāre meñ kyā kahā?*

Apnī bāt se us ne sāf kah diyā ki main uskā shāgird hūñ. Ab tak us ne use dekhā tak nahīñ thā. To bhī wuh apne āpko uskā pakkā shāgird samajhtā thā.

Buzurg taish meñ ā gae. Unhoñ ne use burā-bhalā kahā, “Tū hī uskā shāgird hai, ham to Mūsā ke

shāgird haiñ. Ham to jānte haiñ ki Allāh ne Mūsā se bāt kī hai, lekin is ke bāre meñ ham yih bhī nahīñ jānte ki wuh kahāñ se āyā hai.”

Is jagah par naujawān aur buzurgoñ meñ phūṭ sāf nazar ātī hai.

► *Kaisī phūṭ?*

Buzurg shariyat par bahut faḡhr karte the. Lekin is faḡhr ne unheñ al-Masīh ke lie andhā kar diyā jab wuh un ke sāmne ā maujūd huā. Shariyat aur nabiyon ke nawishte to al-Masīh kī peshgoī karte the. Ghamañḡ insān ko Ḳhudā se dūr kar detā hai.

Naujawān ne jawāb diyā, “Ajīb bāt hai, us ne merī āñkhoñ ko shafā dī hai aur phir bhī āp nahīñ jānte ki wuh kahāñ se hai. Ham jānte haiñ ki Allāh gunāhgāron kī nahīñ suntā. Wuh to uskī suntā hai jo uskā ḡhauf māntā aur uskī marzī ke mutābiq chaltā hai. Ibtidā hī se yih bāt sunane meñ nahīñ āī ki kisī ne paidāishī andhe kī āñkhoñ ko bahāl kar

diyā ho. Agar yih ādmī Allāh kī taraf se na hotā to kuchh na kar saktā.”

Naujawān sādā-sā ādmī thā jabki buzurg ālim the. Kitnī ajīb bāt ki usī ne rūhānī haqīqat ko samajh lī thī jabki buzurg is ke lie andhe the. Jitnā naujawān nūr kī sachchāī kī taraf baḥh rahā thā utnā hī buzurg tārīkī ke sāyoñ meñ gum hote jā rahe the.

► *Naujawān ne do jawāb die. Wuh kyā the?*

Zāhir hai ki Īsā Masīh Ḳhudā kī taraf se hai. Kyoñki

- Ḳhudā usī kī suntā hai jo gunāh nahīñ kartā. Jo uskā ḳhauf rakhtā aur uskī marzī ke mutābiq chaltā hai.
- Aisā mojizā pahle kabhī nahīñ huā hai.

Yih sunkar buzurgoñ ne use gāliyāñ dīñ, “Tū jo gunāhālūdā hālat meñ paidā huā hai kyā tū hamārā ustād bananā chāhtā hai?” Yih kahkar unhoñ ne use jamāt meñ se nikāl diyā.

► *Kyā āpne note kiyā ki unhoñ ne use kyā ṭhahrāyā?*

Unhoñ ne kahā ki tū gunāhālūdā hālat meñ paidā huā hai.

► *Lekin Īsā Masīh ne us ke bāre meñ kyā kahā thā?*

Us ke andhepan kī wajah gunāh nahīñ hai.

► *Īsā Masīh aur buzurgoñ meñ kyā farq nazar ātā hai?*

Buzurg shariyat ko jail samajhte haiñ. Har ek ko zanjiron meñ jakar kar us meñ dālnā hai. Apne āpko wuh jail ke guard samajhte haiñ. Īsā Masīh kī fitrat bilkul farq hai. Wuh hameñ jail kī zanjiron se nikālnā chāhtā hai. Wuh hameñ apne nūr meñ lānā chāhtā hai tāki ham uskī ilāhī dhūp señkeñ. Wuh nahīñ chāhtā ki ham Ḳhudā ke qaidī hoñ. Wuh chāhtā hai ki ham Ḳhudā ke āzād farzand hoñ. Yahī nūr kī baṛī ḳhushḳhabrī hai.

Shariyat aur Īsā Masīh meñ yahī baṛā farq hai. Shariyat hameñ batātī hai ki kyā karnā hai. Zarūr wuh hameñ gunāh ke ḳhatron se mahfūz rakhnā chāhtī hai. Lekin jald hī hameñ patā chaltā hai ki

ham Ḳhudā ke ahkām pūre nahīn kar sakte. Bār bār ham fail ho jāte haiñ. Īsā Masīh isī lie āyā tāki hamārī yih nāqis hālat bahāl kare. Tāki hamāre gunāhoñ ko miṭākar hameñ āzād kare. Nūr kā chhaṭā asar,

Nūr kī Manzil: Parastish

Ab dekho yih azīm bāt: Is naujawān ne Īsā Masīh ko ab tak nahīn dekhā thā. To bhī us ne mazbūtī se buzurgoñ kī dhamkiyoñ kā sāmna kiyā. Wuh apne yaqīn par qāym rahā ki maiñ Īsā Masīh kā shāgird hūñ hālānki ab tak uskī dubārā mulāqāt us se nahīn huī thī.

Īsā Masīh ko patā chalā ki use nikāl diyā gayā hai to wuh us ko milā aur pūchhā,

Kyā tū Ibn-e-Ādam par īmān rakhtā hai? (Yūhannā 9:35)

► *Ibn-e-Ādam se kyā murād hai?*

Dāniyāl nabī ne sadiyoñ pahle al-Masīh ke bāre meñ ek royā dekhī thī. Us meñ us ne dekhā thā ki

Āsmān ke bādaloñ ke sāth sāth koī ā rahā hai jo Ibn-e-Ādam-sā lag rahā hai. Jab Qadīmūl-aiyām ke qarīb pahuñchā to us ke huzūr lāyā gayā. Use saltanat, izzat aur bādshāhī dī gai, aur har qaum, ummat aur zabān ke afrād ne uskī parastish kī. Uskī hukūmat abadī hai aur kabhī khatm nahīn hogī. Uskī bādshāhī kabhī tabāh nahīn hogī. (Dāniyāl 9:13-14)

Naujawān ne kahā, “Ḳhudāwand, wuh kaun hai? Mujhe batāēñ tāki main us par īmān lāūñ.” Naujawān kā Īsā Masīh par itnā bharosā thā ki uskī har farmāish pūrī karne ko taiyār thā. Īsā Masīh ne jawāb diyā,

Tūne use dekh liyā hai balki wuh tujh se bāt kar rahā hai. (Yūhannā 9:37)

► *Naujawān ne kyā jawāb diyā?*

Us ne kahā, “Ḳhudāwand, main īmān rakhtā hūñ” aur use sijdā kiyā.

Yoñ naujawān pūre īmān tak pahuñch gayā. Pahle wuh uskā nām hī jāntā thā. Phir us ne iqrār kiyā ki yih nabī hai. Is ke bād jab buzurgoñ ne use dhamkī dī to us ne sāf kahā ki main uskā shāgird hūñ. Yoñ wuh qadam baqadam īmān meñ taraqqī kartā gayā. Ab jab Īsā Masīh ne farmāyā ki main hī Ibn-e-Ādam yānī al-Masīh hūñ to wuh ek pal bhī na jhijkā balki sīdhā use sijdā kiyā. Pahle uskī jismānī āñkheñ raushan huñ, lekin ab is se baḥkar huā. Ab uskī rūhānī āñkheñ khul gañ aur Īsā Masīh ke nūr se raushan huñ.

Nūr Yā Andherā?

Tab Īsā Masīh ne kahā,

Main adālat karne ke lie is duniyā meñ āyā hūñ, islie ki andhe dekheñ aur dekhne wāle andhe ho jāeñ.

(Yūhannā 9:39)

► *Wuh kis nāte se adālat karne āyā hai?*

Rāt ke waqt jab light andhere ko raushan kare to sharīf log us meñ chalte haiñ. Lekin chor

aur ḍākū light se dūr sāyoṅ meṅ chhipe rahte haiṅ. Isī tarah kuchh kī āṅkheṅ Īsā Masīh ke nūr se raushan ho jātī haiṅ. Aise log uskī sachchāī pahchānkar use ḡhushī se qabūl karte haiṅ. Lekin afsos, dūsre nūr ko bardāsht nahīn kar sakte. Aise log nūr se dūr sāyoṅ meṅ khisak jāte haiṅ. Aise log rūhānī andhe rahte haiṅ.

Kitnī ajīb bāt! Jo pahle andhā thā wuh na sirf apnī jismānī āṅkhoṅ se dekhne lagā balki uskī rūhānī āṅkheṅ bhī raushan huīṅ. Buzurgoṅ ke sāth is ke ulaṭ huā. Wuh apnī jismānī āṅkhoṅ se dekh to sakte the magar un kī rūhānī āṅkheṅ andhī rahīṅ. Mere azīz, kyā āp chāhte haiṅ ki āpkī āṅkheṅ raushan ho jāeṅ? Īsā Masīh ke pās aeṅ. Wuhī duniyā kā nūr hai. Sharīat aur apne nek kāmoṅ par faḡhr mat karnā, apne āp par bharosā mat karnā. Usī nūr se minnat kareṅ ki wuh ākar āpko raushan kare.

Injil, Yūhannā 9

Chalte chalte Īsā ne ek ādmī ko dekhā jo paidāish kā andhā thā. Us ke shāgirdon ne us se pūchhā, “Ustād, yih ādmī andhā kyon paidā huā? Kyā iskā koī gunāh hai yā is ke wālidain kā?”

Īsā ne jawāb diyā, “Na iskā koī gunāh hai aur na is ke wālidain kā. Yih islie huā ki is kī zindagī meñ Allāh kā kām zāhir ho jāe. Abhī din hai. Lāzim hai ki ham jitnī der tak din hai uskā kām karte raheñ jis ne mujhe bhejā hai. Kyonki rāt āne wālī hai, us waqt koī kām nahīn kar sakegā. Lekin jitnī der tak main duniyā meñ hūñ utnī der tak main duniyā kā nūr hūñ.”

Yih kahkar us ne zamīn par thūkkar miṭṭī sānī aur uskī ānkhon par lagā dī. Us ne us se kahā, “Jā, Shiloḡh ke hauz meñ nahā le.” (Shiloḡh kā

matlab ‘bhejā huā’ hai.) Andhe ne jākar nahā liyā. Jab wāpas āyā to wuh dekh saktā thā.

Us ke hamsāye aur wuh jinhoñ ne pahle use bhīkh māngte dekhā thā pūchhne lage, “Kyā yih wuhī nahīn jo baiṭhā bhīkh māngā kartā thā?”

Bāz ne kahā, “Hāñ, wuhī hai.”

Auroñ ne inkār kiyā, “Nahīn, yih sirf uskā hamshakl hai.”

Lekin ādmī ne khud isrār kiyā, “Maiñ wuhī hūñ.”

Unhoñ ne us se sawāl kiyā, “Terī āñkheñ kis tarah bahāl huīñ?”

Us ne jawāb diyā, “Wuh ādmī jo Īsā kahlātā hai us ne miṭṭī sānkar merī āñkhoñ par lagā dī. Phir us ne mujhe kahā, ‘Shiloḅh ke hauz par jā aur nahā le.’ Maiñ wahāñ gayā aur nahāte hī merī āñkheñ bahāl ho gayīñ.”

Unhoñ ne pūchhā, “Wuh kahāñ hai?”

Us ne jawāb diyā, “Mujhe nahīn mālūm.”

Tab wuh shafāyāb andhe ko Farīsiyoṅ ke pās le gae. Jis din Īsā ne miṭṭī sānkar uskī āṅkhoṅ ko bahāl kiyā thā wuh Sabat kā din thā. Islie Farīsiyoṅ ne bhī us se pūchh-gachh kī ki use kis tarah basārat mil gāi. Ādmī ne jawāb diyā, “Us ne merī āṅkhoṅ par miṭṭī lagā dī, phir mainne nahā liyā aur ab dekh saktā hūn.”

Farīsiyoṅ meṅ se bāz ne kahā, “Yih shaḵḵs Allāh kī taraf se nahīn hai, kyoṅki Sabat ke din kām kartā hai.”

Dūsroṅ ne etarāz kiyā, “Gunāhgār is qism ke ilāhī nishān kis tarah dikhā saktā hai?” Yoṅ un meṅ phūṭ par gāi.

Phir wuh dubārā us ādmī se muḵhātib hue jo pahle andhā thā, “Tū ḵhud is ke bāre meṅ kyā kahtā hai? Us ne to terī hī āṅkhoṅ ko bahāl kiyā hai.”

Us ne jawāb diyā, “Wuh nabī hai.”

Yahūdiyoṅ ko yaqīn nahīn ā rahā thā ki wuh wāqaī andhā thā aur phir bahāl ho gayā hai.

Islie unhoñ ne us ke wālidain ko bulāyā. Unhoñ ne un se pūchhā, “Kyā yih tumhārā beṭā hai, wuhī jis ke bāre meñ tum kahte ho ki wuh andhā paidā huā thā? Ab yih kis tarah dekh saktā hai?”

Us ke wālidain ne jawāb diyā, “Ham jānte haiñ ki yih hamārā beṭā hai aur ki yih paidā hote waqt andhā thā. Lekin hameñ mālūm nahīñ ki ab yih kis tarah dekh saktā hai yā ki kis ne is kī āñkhoñ ko bahāl kiyā hai. Is se ḳhud patā kareñ, yih bālīgh hai. Yih ḳhud apne bāre meñ batā saktā hai.” Us ke wālidain ne yih islie kahā ki wuh Yahūdiyoñ se ḍarte the. Kyoñki wuh faislā kar chuke the ki jo bhī Īsā ko Masīh qarār de use Yahūdī jamāt se nikāl diyā jāe. Yahī wajah thī ki us ke wālidain ne kahā thā, “Yih bālīgh hai, is se ḳhud pūchh leñ.”

Ek bār phir unhoñ ne shafāyāb andhe ko bulāyā, “Allāh ko jalāl de, ham to jānte haiñ ki yih ādmī gunāhgār hai.”

Ādmī ne jawāb diyā, “Mujhe kyā patā hai ki wuh gunāhgār hai yā nahīn, lekin ek bāt main jāntā hūn, pahle main andhā thā, aur ab main dekh saktā hūn!”

Phir unhoñ ne us se sawāl kiyā, “Us ne tere sāth kyā kiyā? Us ne kis tarah terī āñkhoñ ko bahāl kar diyā?”

Us ne jawāb diyā, “Main pahle bhī āpko batā chukā hūn aur āpne sunā nahīn. Kyā āp bhī us ke shāgird bananā chāhte haiñ?”

Is par unhoñ ne use burā-bhalā kahā, “Tū hī uskā shāgird hai, ham to Mūsā ke shāgird haiñ. Ham to jānte haiñ ki Allāh ne Mūsā se bāt kī hai, lekin is ke bāre mein ham yih bhī nahīn jānte ki wuh kahān se āyā hai.”

Ādmī ne jawāb diyā, “Ajīb bāt hai, us ne merī āñkhoñ ko shafā dī hai aur phir bhī āp nahīn jānte ki wuh kahān se hai. Ham jānte haiñ ki Allāh gunāhgāroñ kī nahīn suntā. Wuh to uskī suntā hai jo uskā khauf māntā aur uskī

marzī ke mutābiq chaltā hai. Ibtidā hī se yih bāt sunane meñ nahīñ āī ki kisī ne paidāishī andhe kī āñkhoñ ko bahāl kar diyā ho. Agar yih ādmī Allāh kī taraf se na hotā to kuchh na kar saktā.”

Jawāb meñ unhoñ ne use batāyā, “Tū jo gunāhālūdā hālat meñ paidā huā hai kyā tū hamārā ustād bananā chāhtā hai?” Yih kahkar unhoñ ne use jamāt meñ se nikāl diyā.

Jab Īsā ko patā chalā ki use nikāl diyā gayā hai to wuh us ko milā aur pūchhā, “Kyā tū Ibn-e-Ādam par īmān rakhtā hai?”

Us ne kahā, “Ḳhudāwand, wuh kaun hai? Mujhe batāeñ tāki main us par īmān lāūñ.”

Īsā ne jawāb diyā, “Tūne use dekh liyā hai balki wuh tujh se bāt kar rahā hai.”

Us ne kahā, “Ḳhudāwand, main īmān rakhtā hūñ” aur use sijdā kiyā.

Īsā ne kahā, “Main adālat karne ke lie is duniyā meñ āyā hūñ, islie ki andhe dekheñ aur dekhne wāle andhe ho jāeñ.”

Kuchh Farīsī jo sāth khaṛe the yih kuchh sunkar pūchhne lage, “Achchhā, ham bhī andhe haiñ?”

Īsā ne un se kahā, “Agar tum andhe hote to tum qusūrwar na ṭhahrte. Lekin ab chūñki tum dāwā karte ho ki ham dekh sakte haiñ islie tumhārā gunāh qāym rahtā hai.